

VENDIM
Nr. 624, datë 18.9.2019

PËR PËRBËRJEN, ORGANIZIMIN DHE FUNKSIONIMIN E KËSHILLIT
KOMBËTAR TË PACIENTËVE

Në mbështetje të nenit 100 të Kushtetutës dhe të pikës 2, të nenit 6/2, të ligjit nr. 10107, datë 30.3.2009 “Për kujdesin shëndetësor në Republikën e Shqipërisë”, të ndryshuar, me propozimin e ministrit të Shëndetësisë dhe Mbrojtjes Sociale, Këshilli i Ministrave

VENDOSI:

1. Ngritjen e Këshillit Kombëtar të Pacientëve si një mekanizëm kryesor komunikimi e këshillimi ndërmjet Ministrisë së Shëndetësisë dhe Mbrojtjes Sociale dhe pacientëve, i cili kryesohet nga ministri përgjegjës për shëndetësinë, ose personi i autorizuar prej tij, dhe ka këtë përbërje:

a) Një përfaqësues të organizatave jofitimprurëse, që mbulojnë çështje të sëmundjeve jo të transmetueshme (kronike);

b) Një përfaqësues të organizatave jofitimprurëse, që mbulojnë çështje të sëmundjeve të transmetueshme infektive;

c) Një përfaqësues të organizatave jofitimprurëse, që mbulojnë çështje të sëmundjeve të rralla;

ç) Një përfaqësues të organizatave jofitimprurëse, që mbulojnë çështje të kujdesit paliativ;

d) Një përfaqësues të organizatave jofitimprurëse, që trajtojnë çështje që lidhen me të sëmurët me aftësi të kufizuara;

dh) Një përfaqësues të organizatave që trajtojnë çështje të të sëmurëve talasemikë/hemofilikë;

e) Një përfaqësues nga Ministria e Shëndetësisë dhe e Mbrojtjes Sociale;

ë) Një përfaqësues nga Operatori i Shërbimeve të Kujdesit Shëndetësor;

f) Një përfaqësues nga Fondi i Sigurimit të Detyrueshëm të Kujdesit Shëndetësor.

2. Përzgjedhja e anëtarëve, përfaqësues të organizatave jofitimprurëse/ organizatave për Këshillin Kombëtar të Pacientëve bëhet 1 (një) herë në 3 (tre) vjet nga ministri përgjegjës për shëndetësinë, nëpërmjet një komisioni *ad-hoc* në përfundim të një procedure konkurrimi të hapur, mbështetur në kritere që vlerësojnë përparësitë e përfaqësimit dhe të gjithëpërfshirjes.

Ministria përgjegjëse për shëndetësinë njofton menjëherë Këshillin Kombëtar të Pacientëve për çdo kandidat të përzgjedhur.

3. Këshilli Kombëtar i Pacientëve jep mendime e këshilla për çështje dhe vendime që lidhen me impaktin të pacientët të politikave socio-shëndetësore, me qëllim përmirësimin e cilësisë së këtyre shërbimeve.

4. Këshilli Kombëtar i Pacientëve funksionon, si më poshtë vijon:

a) Këshilli mbledhet mbi bazën e një kalendari, por jo më pak se 2 (dy) herë në vit;

b) Kryetari thërret mbledhjen dhe e drejton atë. Në rast se ai nuk është i pranishëm, mbledhja drejtohet nga anëtari më i moshuar, pjesëmarrës në mbledhje;

c) Kryetari propozon rendin e ditës dhe vendos për datën e kohën e mbledhjes së radhës, përveç rasteve kur vetë Këshilli ka vendosur ndryshe;

ç) Mbledhja e Këshillit njoftohet me shkrim nga kryetari të paktën 10 (dhjetë) ditë para datës së mbledhjes. Ftesa për mbledhje duhet të përmbajë datën, orën, vendin e zhvillimit të mbledhjes, rendin e ditës dhe materialet mbështetëse, të cilat u dërgohen anëtarëve të Këshillit në formë të shkruar apo elektronike;

d) Çdo ndryshim në datën dhe kohën e vendosur për mbledhjet i njoftohet çdo anëtari, në mënyrë që të njihet me këto ndryshime;

dh) Mbledhjet zhvillohen në ambientet e Ministrisë së Shëndetësisë dhe Mbrojtjes Sociale dhe realizohen nëse në to janë të pranishëm të paktën gjysma e anëtarëve të Këshillit. Kur ky numër nuk arrihet, mbledhja shtyhet dhe mbahet brenda 24 (njëzet e katër) orëve;

e) Në çdo mbledhje të Këshillit mbahet procesverbal që pasqyron të gjitha diskutimet gjatë mbledhjes.

5. Qëndrimi në detyrë i anëtarit të Këshillit Kombëtar të Pacientëve përfundon:

a) me dorëheqjen e vetë anëtarit të Këshillit, për të cilën duhet të njoftojë me shkrim 1 (një) javë përpara organin që e ka propozuar;

b) për mospjesëmarrje në dy mbledhje radhazi;

c) në raste të tjera të parashikuara në ligj.

6. Sekretariati i Këshillit Kombëtar të Pacientëve është struktura mbështetëse për Këshillin, i cili përbëhet nga 2 (dy) persona që janë pjesë e administratës së ministrisë përgjegjëse për shëndetësinë.

7. Sekretariati i Këshillit përgatit materialet për takimet e Këshillit, njofton anëtarët e Këshillit për mbledhjet e radhës së Këshillit, mbledh e shpërndan informacione, mban procesverbalin gjatë takimit të Këshillit, zbardh dhe e shpërndan atë, si edhe ushtron detyra sipas kërkesave të Këshillit Kombëtar të Pacientëve.

8. Anëtarët e Këshillit Kombëtar të Pacientëve të shpërblehen sipas legjislacionit në fuqi për shpërblimin e anëtarëve të bordeve/komiteteve/komisioneve.

9. Efektet financiare, që rrjedhin nga zbatimi i këtij vendimi të përballohen nga buxheti i Ministrisë së Shëndetësisë dhe Mbrojtjes Sociale.

10. Ngarkohet Ministria e Shëndetësisë dhe Mbrojtjes Sociale për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR

Edi Rama